



Kalaallit Nunaanni imartap killeqarfiata 3 smil-iniit 12 smil-imut annertusineqarsinnaaneraniq periarfissat misissorneqarnissaanik kiisalu tamatuma inatsisitigut, aningaasaqarnikkut inuussutissarsiornikkullu kingunerisassai pillugit nassuiaateqarnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut. Misissuineq Inatsisartut UPA2028-mut saqqummiunneqassapput.

(Inatsisartunut ilaasortaq Jens NaptK', Naleraq)
(Siullermeerneqarnera)

Qujanaq Inatsisartunut ilaasortaq Jens NaptK' siunnersuummut.

Nunarput immamik ungaluneqarsimavoq imartatsinnullu isiginnittariaaserput piorsarsimassutsimiiginnarani oqaluttuarisaanitsiit aallaaveqaannangilaq. Aammali politikikkut pilersaarusionermut pingaaruteqarluinnartuuvoq. Taamaattumik imartap killeqarfiata annertusineqarnissaanik apeqqut atuisinnaatitaanitsinnut, akisussaaffitsinnut aammalu siunissami ineriartortitsinissamut periarfissanut attuumassuteqarpoq.

Demokraatit silatusaarnertut isigaat, annertusineqarnissamik periarfissat 3-smil-iniit 12-smil-imut misissorneqarnissaat. Taamatut annertunerulersitsineq annertuumik iluaqutitaqarsinnaavoq, tassani avatangiisinut pissutsit nakkutiginerulernissaannut periarfissat, angallannermi isumannaallisaaanerup pitsaanerulernera aammalu annertunerusumik nammineq imartatta nakkutiginerunissaanut.

Aammali sammisaq tassaavoq, annertuumik ilimagisamiit aqqikkuminaannerusoq. Forsvarsministeriaqarfiup nalunaarutigaa, annertusaaneq annertunerujussuarmik pilersitsissammat, nunamut oqartussaaneermik isummerfigisassamut, taamaaliornikkullu nakkutiginninnissamut suliaassanullu naammassisassanut pisariaqartitsineq annertusissalluni. Taamatuttaaq Kalaallit Nunaanni Politiit annertunerujussuarmik oqartussaaffeqalissallutik, suliaassat annertunerit malitsigalugit inatsisit malitsinniarneri misissuinerillu eqqarsaatigalugit.

Taakku saniatigut annertusaaneq upalungaarsimanerup annertusarnissaanik kinguneqassalluni, tassani avatangiisinut tunngasunik sulianut tunngatillugu. Aamma pisariaqartinneqalissaaq oqartussaasut akornanni annertunerusumik ataqatigiissaarisooqartalernissaa, akuersissutit amerlanerit, tusarniaanerit amerlanerit aammalu taakku malitsigisaannik inuiaqatigiit tamarmiusut isigalugit allaffissornerulernerup nanertuutaanerulernera. Tassunga ilutigalugu imartatsinnut akisussaaffiup annersaa maanga nunatsinnut nuunneqassaaq, tamannalu aningaasatigut kinguneqartussaallunittaaq.

Taassuma pisariaqartoq erseqqissarpaa, nalunaarusiortoqassappat inatsisitiguinnaq



inuussutissarsiutinuinnarlu periarfissat nalunaarsorneqassanngimmata, aammali annertuumik pisortanut aningaasatigut allaffissornikkullu kingunissai. Pingaartuuvoq, Inatsisartut ersarilluinnartumik tungaveqarnissaat, taama annertutigisumut isumminnginnermini.

Paasinnillutik Demokraatit naleqquttutut isigaat, siunnersuut Aningaasaqarnermut- aamma Akileraarnermut ataatsimiititaliami suliareqqitassanngorlugu innersuunneqassasoq, pissutsit taakku sukumiisumik paasinarsarneqassammata.